

IN MEMORIAM
ПРОФ. ДР ЯНКО РАМАЧ
(1955–2022)



Дня 27. августа 2022. року у 67. року у транспортним нещесці страдал Янко Рамач, професор на Одзеленю за русинистику Филозофского факултету Универзитету у Новим Садзе.

Янко (Дюра) Рамач народзени у Руским Керестуре 22. марта 1955. року. У родним валале закончел основну школу, а потим и гимназию, 1975. року. Закончел и штири роки класичней гимназиї у Риме. На Филозофским факултету у Новим Садзе дипломовал на Групи за историю 1980. року. Штири роки робел як кустос у Войводянским музею у Новим Садзе. На Филозофским факултету у Новим Садзе почал робиц 1984. року на Одзеленю за русинистику, практично од його снованя. Прешол звичайну драгу университетского наставніка. По 1988. рок бул асистент-приправник, потим асистент (1988–1996) на предмету История Руснацох. Магистерску роботу *Привредни и дружствени живот Руснацох у Южней Угорскей (1848–1918) / Привредни и друштвени живот Русина у Јужној Угарској (1848–1918)* одбранел 1990. року на Филозофским факултету у Београдзе, на Групи за историю. Докторску дисертацию *История Руснацох у Южней Угорскей (1745–1918) / Историја русинів Південної Угорщини (1745–1918)* одбранел 1995. року на Историйним факултету Державного универзитету у Ужгородзе, у України. Ушлїдзел вибор до звання доцента 1996. року, потим до звання позарядового професора 2001. року и до звання порядного професора 2006. року.

У медзичаше, од 2000–2003. бул на постдокторскей специялизациї на Катедри за русинистику и українистику на Високей школи у Ніредьгази у Мадярскей. Специялизация облапяла наукововигледовацку роботу хтора реализована у Сеченї библиотеки у Будимпешти и у Державним архиве Мадярскей у Будимпешти, як и преподаваня студентом русинистики и українистики на українским язyku хторе тирвало 6 семестри.

У рамикох работи на Филозофским факултету у Новим Садзе участвовав у работи органах факултета (Наставно-наукова рада, Совет факултету) и Универзитету (член Фаховей ради за гуманистични науки, од 2019. року); у комисийох за вибор до званя; як ментор у писаню закончующих роботох студентом на основних, мастер и докторских студийох; як член комисийох за писане закончующих роботох на основних, мастер и докторских студийох; як член комисий за приступне преподаване асистента при вибору до званя доцента. Бул и член комисийох на одбранох дипломских роботох на Учителским факултет у Зомборе. Функцию шефа Одзеленя за русинистику на Филозофским факултету у Новим Садзе окончовал у периодзе од 2015–2021, а потим бул заменїк шефа на истим одделеню.

На Филозофским факултету у Новим Садзе на основних академских студийох преподавал предмети: Фолклористика, История Руснацох I, История Руснацох II, Културна история Руснацох, а на мастер академских студийох. Русинске питане у Стредней Европи у XX вику. Тримал вежби зоз предмета Стара українска литература. На постдипломских студийох преподавал Историю українскей култури. На Филологийним факултету у Београдзе, од 2002. року, од самого снованя Одзеленя за українистику, як госцуюци професор тримал преподаваня зоз предметох Културна история українского народу 1 и 2 односно Українска култура 1 и 2. Даєдни преподаваня, циклуси преподаваньох або семестрални курси тримал на домашнїх и иноземних университетох. Проф. Рамач у рамикох програми Еразмус + три раз пребувал як преподавач на Гданьским университету на Одзеленю за славистику, раз на Прешовским университету у Словацкей, як и на Универзитету Матея Бела у Банскей Бистрици у Словацкей, на Универзитету у Вроцлаву, на Национальным университету у Ужгородзе, на Универзитету „Иван Франко у Львовє”, на Катедри за славистику у Триру, а тримал и онлайн преподаваня на Киевским университету „Тарас Шевченко”.

У рамикох педагогийней работи, окрем пририхтованя литературы за студентох, пририхтовал и додатки зоз истории Руснацох за учебнїки истории

за основну школу и гимназию на руским язика. Так у учебнікох за основну школу на руским наставним язика перши раз дати систематични препатрунок историї Руснацох зоз найвчаснейших часохла по нешкайши дні.

Основна обласц його интересованя була история Руснацох у Южней Угорскей/Югославиї.

У рамикох културней историї Руснацох занїмал ше зоз виучованьом историйного материялу и старших руских рукописних зборнікох и епистолярного наслїдства визначних особохла: Г. Костельника, А. Духновича... У своїх вигледованьох пошвецел ше и фолклору Руснацох и Українцохла, моделом организованя вирского, просвитного и национального живота тей националней заєднїци од XVII по конец XX вику, як и дружтвено-економскому положеню Руснацох у Угорскей. Тиж так, занїмал ше зоз културними и литературними вязыми Руснацох зоз Сербями, Словацями, Румунами и другими националними заєднїцями Угорскей и єй державохла-наслїднїцохла. У тих вигледованьох указовал же национални и конфесийни розлики не препреченя за добри одношеня и сотруднїцтво. Його роботу у тей обласци препознала и словацка национална заєднїца у Сербїї. Просвитна комисија Матки словацкей у Сербїї му на Словацких народних святачносцохла 2018. року у Бачким Петровцу уручела Окремне припознане за заслуги у обласци образованя, васпитаня и унапредзованя словацкого язика и словацкей култури. У остатнїм периодзе його наукововигледовацка работа була унапрямена на историю и културну историю Руснацох медзи двома шветовими войнами, як и на културни и национални контакти и сотруднїцтво Руснацох у Югославиї зоз Україну, як и Руснацями и Українцями у дияспори.

Проф. Янко Рамач прекладал етнографски материял на руски язик зоз сербского, українского, немецкого и латинского. Прекладал и зоз українского и руского на сербски. За преклад Библиї (у коавторстве зоз писательом Михалом Рамачом) – перши на швецел комплетни преклад Старого и Нового писма зоз старогреческого жридловнїка на руски язик – достал Орден и Диплому Витязя ряду св папи Силвестера (Equites ordini Sancti Silvesteri papae).

Бул иницијатор организованя або соорганизатор даскелїх симпозиюмохла и конференцийохла у Новим Саду (*Интеркултуралносц у образованю* 2018; Други карпатски симпозиум, односно VII медзинародни наукови сход *Лемки, Бойки, Гуцули, Русини – история, сучасносц, материялна и духовна култура* 2019; медзинародна наукова конференция

Селїдби Українцох на простор бывшей Югославїї (130 роки од досельованя) 2021); Медзинародни науково конференції *Живот и діло проф. Юлиана Рамача* 2021; и *3 нагоди 40 рокох Русинистики на Филозофском факултету у Новим Саду* 2022).

Як длугорочному учашніку на медзинародних конференційох хтори биенално организую у Польскей и Словацкей, проф. Рамачови на конференції хтора 2017. року отримана у Банскей Бистрици/Старей Лесни у Словацкей додзелене окремене припознанє (*Patätný list*) катедри за историю Филозофского факултета Универзитета Матея Бела у Банскей Бистрици.

Участвовав на числених медзинародних наукових конференційох у жеми и иножемстве у Новим Саду, Београду, Нишу, Руским Керестуре, Бачким Петровцу, Бекешчаби, Дебрецину, Кечкемету, Ніредьгази, Баї, Триру, Надлаку, Прешове, Свидніку, Банскей Бистрици, Ужгородзе, Києве, Лавове, Познаню, Іданьску, Вроцлаве, Слупску, Брну, Загребе и других местох.

Бул главни и одвичательни редактор часописа *Русинистични студії / Ruthenican Studies*, хтори на його иницијативу порушани 2017. року при Одделеню за русинистику, член редакції часопису *Годишњак Филозофског факултета Универзитета у Новом Саду* (од 2015), член редакції українского наукового часописа *Сумска старовина*, член ушорїовацког колегиума за наукову обласц у часопису за науку, литературу, культуру и уметносц *Шветлосц*, член редакції наукового зборніка *Українистика и словенски свет* Филологийного факултета у Београду, иножемни член редакції наукового часописа Киевского университета *Київські історичні студії / Kyiv Historical Studies* (од 2019). Тиж так бул член редакції за историю *Енциклопедії Войводини*, член редакції часописа *Studia Ruthenica*, Руско-українского християнского часописа *Дзвони*, як и член редакції часописа Центра за мултикультуралносц у Новим Саду *Информатор*. Бул редактор *Енциклопедії Руснацох и Українцох Югославїї* и главни и одвичательни редактор пилот виданя тей енциклопедії. Бул член и секретар Академского здруженя Руснацох и Українцох (у рамикох Союзу Руснацох и Українцох Сербїї) и член Дружтва историчарох Сербїї. Як волонтер бул член Управного одбора Екуменскей гуманитарней організації у Новим Садзе од 2012.

Проф. Рамач бул руководитель або учашнік на вецей домашніх наукових проєктох финансваних з боку Министерства просвити, науки и

технологійного розвою Републики Сербії и секретаріята за високе образованє и наукововигледовацку діялноц АП Войводини.

Обявел 15 кніжки (як автор/коавтор, прекладатель, редактор), 195 науково роботи, прикази и прилоги; поглявя у 11 учебнікох исторії на руским язика за основну школу; 47 библиографски єдинки зоз прекладательней діялноци, 4 библиографски єдинки зоз ушорйовацкей діялноци и 7 библиографски єдинки хтори ше одноша на уводни слова и рецензії. Винїмково богата библиография шведочи о його континуованей науковей роботи. Тото потвердзує и факт же професор Янко Рамач и наш найцитованши професор з найвисшим индексом компетенції.

Проф. Рамач бешедовал вецей шветово язика: украински, италиянски, словацки, анлийски, немецки, русийски, а хасновал и класични язика – латински и старогречески. Науково роботи писал на руским, сербским и украинским язика, а обявйовал и на анлийским и словацким.

И попри винїмково успишной педагогийней и наукововигледовацкей роботи, проф. Рамач своїм найвекшим успихом видзел тото же його дзивчата Ксенія, Тат'яна и Кристина закончели високи школи, и же су успишни у своїх фахах и пошвечени своїм фамелиюм.

Професор Рамач зоз свою роботу и особнима прикметами, з ясным и обгрунтованима науковима становисками, твардима моралними принципами, зоз несебичним закладаньом и винїмкову систематичносцу у наукових вигледованьох, хтору нашлїдзел од своїх професорох на матичним факултету, як и вельку пошвеченосцу студентом, заслужел епитет бизовного историчара не лєм у войводянских наукових рамикох але и ширше, у европских, та и шветових. О тим шведочи и його сотрудніцтво зоз колегами зоз України, Польскей, Естонії, Словацкей, Мадярскей, Румунії, Италиї, Япону и других жемох. Дзекуючи широкому кругу познанствох, библиотеки Одзеленя за руски язик на матичним факултету обезпечел вельке число странских публикаційох. Цалосна работа визначного слависти проф. Янка Рамача дава невимерліве доприношене факултету на хторим препровадзел лемцо не цали работни вик, охабя глібоки шлїд у историографії о Руснацох и незаобиходна є основа за подобни вигледованя у наведзеней обласци.

Професор Янко Рамач поховани у Кисачу 30. 08. 2022. року.

Вична память!

Доц. др Даниела Марчок
doi: 10.19090/rs.2022.6.11-15